

**12 masjid wilayah persekutuan dipilih sebagai pusat aduan, kaunseling mangsa keganasan rumah tangga**

Bernama

November 26, 2023 05:20 MYT

KUALA LUMPUR: Sebanyak 12 masjid di Wilayah Persekutuan telah dipilih sebagai pusat aduan dan khidmat kaunseling kepada mangsa keganasan rumah tangga yang memerlukan khidmat nasihat, sokongan psikologi serta kaunseling.

Menteri Pembangunan Wanita, Keluarga dan Masyarakat Datuk Seri Nancy Shukri berkata selain itu, dua masjid iaitu Masjid Wilayah Persekutuan Kuala Lumpur dan Masjid Al-Ghufran di Pinggiran Taman Tun Dr Ismail (TTDI) pula dipilih sebagai Pusat Transit Keganasan Rumah Tangga bagi membolehkan mangsa mendapatkan perlindungan.

"Kementerian bekerjasama dengan Jabatan Agama Islam Wilayah Persekutuan (JAWI) untuk mewujudkan Pusat Transit Keganasan Rumah Tangga di masjid-masjid di Wilayah Persekutuan. Inisiatif ini dilaksanakan bagi memperluaskan fungsi masjid sebagai pusat komuniti setempat yang menyediakan pelbagai kemudahan meliputi keperluan psikososial dan spiritual," katanya.

Beliau berkata demikian dalam ucapan pada Sambutan Hari Menangani Keganasan Terhadap Wanita Tahun 2023 (EVAW)), di sini pada Sabtu.

Nancy berkata inisiatif berkenaan telah dilaksanakan sejak 2021 di bawah pelan pengimaranan masjid di bawah JAWI.

Nancy berkata isu keganasan terhadap wanita dan kanak-kanak perempuan sering menjadi fokus utama kerana ia melangkaui batas sempadan, agama, bangsa dan budaya.

Katanya berdasarkan laporan Pertubuhan Bangsa-Bangsa Bersatu (PBB), hampir satu daripada tiga wanita di seluruh dunia mengalami keganasan fizikal atau keganasan seksual sekurang-kurangnya sekali seumur hidup.

"Tragedi ini telah merebak kepada situasi dan keadaan yang berbeza, termasuk di tempat awam, tempat kerja dan dalam talian serta telah diburukkan lagi oleh kesan pasca-pandemik COVID-19. Terdapat lima bentuk keganasan yang dikenal pasti boleh berlaku kepada wanita, iaitu penderaan fizikal, penderaan seksual, penderaan sosial, penderaan kewangan serta penderaan psikologi dan emosi.

Masyarakat lebih mengetahui mengenai penderaan fizikal dan seksual. Namun begitu, ramai yang kurang sedar mengenai jenis bentuk keganasan lain yang boleh berlaku terhadap wanita. Ugutan, penghinaan, menjatuhkan maruah wanita adalah bentuk penderaan psikologi dan emosi," katanya.

Nancy berkata berdasarkan statistik polis, kes keganasan terhadap wanita yang melibatkan keganasan rumah tangga, jenayah rogol dan gangguan seksual di seluruh negara merekodkan sebanyak 9,334 kes pada 2021 dan 8,580 kes pada 2022 dan bagi tahun ini, sehingga Ogos, sebanyak 5,050 kes telah direkodkan.

Nancy berkata bagi menangani isu keganasan terhadap wanita, kementerian telah melaksanakan Program Advokasi Antigangguan Seksual (AAGS) bertujuan memberikan kesedaran dan pendidikan mengenai gangguan seksual agar budaya penormalan gangguan seksual dapat dihapuskan dan sehingga Isnin lepas (20 Nov) sebanyak 66 program AAGS membabitkan 19,423 peserta telah dilaksanakan.

Sementara itu, berhubung isu warga emas yang disyaki melakukan amang seksual terhadap dua kanak-kanak perempuan di sebuah pusat pemindahan sementara (PPS) banjir, beliau berkata mangsa yang terlibat telah diberikan kaunseling manakala lelaki berkenaan sudah ditahan.

-- BERNAMA